

'Serigala merah' risaukan nelayan

BK 30/10/23 M/S 15

Baung ekor merah dikategori ikan pemangsa banyak di Sungai Bernam dekat sempadan Perak, Selangor

Slim River: Ikan baung ekor merah atau digelar 'serigala merah' (*Hemibagrus wyckioides*) dalam kalangan nelayan sungai yang dikategorikan ikan invasif banyak menghuni di Sungai Bernam bersempadan Perak dan Selangor.

Setiap hari, nelayan menangkap banyak ikan spesies itu yang bersaiz besar hingga mencecah 10 kilogram seekor.

Nelayan berkata berpuluh-puluh ekor ikan berkenaan yang bersaiz besar berjaya ditangkap menggunakan tajur yang dipasang di tebing sungai terbabit.

Nelayan, Mohd Nizam Sidek, 39, berkata dia mulai menangkap ikan terbabit selepas rakan lain memaklumkan sungai itu kini mempunyai banyak ikan spesies

berkenaan sejak tahun lalu.

Katanya, dia terkejut kerana dalam masa lima hari dengan berumpukan ikan kelilalu dia berjaya menangkap lebih 12 baung ekor merah lebih 10 kilogram (kg) seekor di sungai berkenaan.

"Oleh kerana saiz ikan terlalu besar dan berat menyebabkan ia dijual RM10 sekilogram kepada peraih dan restoran berdekatan.

"Orang ramai tidak berminat beli kerana saiznya terlalu besar dan kadangkala saya sedekahkan sahaja kepada penduduk.

"Nelayan dan penduduk menggelar ikan terbabit 'serigala merah' mungkin disebabkan ekornya berwarna merah di samping sifatnya agak ganas ketika memakan mangsa," katanya.

Ancam udang galah

Mohd Nizam yang juga nelayan sepenuh masa sejak 20 tahun yang lalu berkata, dia bersama nelayan lain sering bekerjasama menangkap seberapa banyak ikan itu di sungai berkenaan.

Katanya, walaupun ikan itu mampu memberi sumber pendapatan dalam jangka masa panjang, namun boleh mengancam spesies ikan lain dan udang galah kerana sifatnya terkenal sebagai

haiwan pemangsa.

"Sebagai nelayan darat sepenuh masa dan hanya mengharapkan hasil pendapatan daripada menjual ikan memang saya bimbang akan kewujudan spesies itu," katanya.

Mohd Nizam berkata, mereka juga hairan kerana sebelum ini spesies itu tidak ada di sungai berkenaan dan jarang ditangkap nelayan.

Katanya, jika usaha mengawal tidak dilakukan, nelayan kluatir spesies ikan sungai lain akan pupus kerana menjadi mangsa baung ekor merah, sekali gus akan menjejaskan punca rezeki nelayan.

Abangnya, Mohd Azwan, 42, berkata dia pernah menangkap lima ikan itu yang beratnya lebih 100kg menggunakan tajur di sungai berkenaan.

Katanya, ikan terlalu besar dan agak asing dalam kalangan penduduk menyebabkan ia sukar dijual kepada orang ramai.

"Peraih ikan yang membeli itu pun memotong ikan itu terlebih dulu sebelum menjual kepada orang ramai.

BH semalam mendedahkan beberapa sungai utama negara ini, terutama di Pahang, Selangor dan Perak dikesan menjadi ha-



Mohd Nizam (kanan) dan Mohd Azwan menaikkan baung ekor merah yang ditangkap menggunakan tajur di Sungai Bernam.

bitat ikan pemangsa (invasif) hingga mula mengancam populasi ikan tempatan yang selama ini mendiami saluran itu, berikutan keupayaannya membiak dan membesar dengan cepat.

Ikan invasif atau spesies asing

ini asalnya dibawa masuk bagi tujuan hobi atau dibela dalam akuarium, namun kemudian dilepaskan pihak tidak bertanggungjawab ke sistem saluran tempatan apabila tidak lagi mampu mengendalikannya.